

**Uunga siunnersuut: Aalisarnermut aningaasaliissutitut immikkoortitat pillugit Inatsisartut inatsisaata allanngortinnissaa pillugu Inatsisartut inatsissaat**  
(Aalisarnermut, Piniarnermut Nunalerinermullu Naalakkersuisoq)

**Saqqummiussissutissaq**

**Siullermeenera**

Aalisarnermut aningaasaliissutitut immikkoortitat pillugit Inatsisartut inatsisaata allannguutissaatut siunnersuut matumuuna Naalakkersuisut sinnerlugit saqqummiutissavara. Siunnersuutip kingunerisaanik angallatinik isaterinermut tapiissuteqariaatsit allanngortinneqassapput inatsisissami kapitali 6-imi takuneqarsinnaasutut.

Piginnaatitaaffiit atuuttut naapertorlugit pingaarnertut maleruagassaavoq, angallammik piginnittoq isaterinissamut tapiissutinik pissarsigaangat aalisarsinnaanissamut akuersissutit atorunnaarsinneqartarmata. Tamatumunnga tunggaviuvoq inatsisip suliarinera aallartisimalaaginnalersoq isaterinissamut tapiissuteqartarnerit aalisarmi naleqqussaanissamut suliniutitut ilaatinneqarsinnaanissaa kissaatigineqarmat.

Naak taamaasiortoqaraluartoq politikikkut kissaatigineqarsimavoq pissutsini ataasiakkaanni aalisarsinnaanissamut akuersissutit aalisartunit pigiinnarneqarsinnaassasut. Taamaattumik 2012-imi upernaakkut ataatsimiinnermi siunnersuutigineqarpoq aalisartut ataatsimoorlutik aalisariummik nutaamik pisinissartik kissatigigaangassuk aalisarsinnaanissamut akuersissutit pigiinnarneqarsinnaassasut. Siunnersuut saqqummiunneqarpoq politikikkut soqutigisat eqqarsaatigalugit ilutigalugulu naleqqussaanermik suliani aalisariutit amerlassusaat eqqarsaatigalugit naleqqussaasoqassamat.

Misilittakkakkali naapertorlugit isaterinerit ingerlanneqartartut ikippallaarput aningaasanut inatsimmi aningaasanut immikkoortinneqarsimasunut sanilliullugit. Siunnersuutip kingunerisaanik isaterinerit ingerlanneqareernerisigut qinnuteqartut aalisarsinnaanissamut akuersissutaatik tigummiinarsinnaasavaat. Taamatut iliortoqarpoq siunnersuut aqutigalugu angallatinik amerlanerusunik isaterisoqartalersinnaanissaa naatsorsuutigineqarmat.

Siunnersuummi aaqqiissutit erseqqissaassutillu allat ilanngullugit suliarineqarput:

Inatsimmi § 14, imm. 2-mi, nr. 4 aamma 5-imi angallatit aalisarsinnaanissamut piginnaatitaaffinnik minnerpaamik 50%-iinik ukiuni marlunni kingullerni aalisarsimanissaanik aammalu qinnuteqarnermi angallatit aallariaannaanissaanik aalajangersakkat peerneqarput. Piumasaqaatit taakku angallatit ukiuni kingullerni marlunni Kalaallit Nunaanni aalisarsimanissaanik piumasaqaammik taarserneqarput.

Siunnersuutip kingunerisaanittaaq angallatit pisortanit taarsigassarsinikkut tapiiffigineqarnikkulluunniit pissarsiarineqarsimasut, isaterinissamut tapiiffigineqartarsinnaassammata taarsigassarsianik tapiissutinilluunniit tunniussinermi kingullermit ukiut qulit qaangiunneranni. Taamatut ukiunik qulinik aalajangersaasariaqarneq erhvervsstøtte aqutigalugu qaqugukkut nutaanik taarsigassarsinnaanissamut

maleruagassaartoqarneranik pissuteqarpoq. Taamaasiortoqarneratigut suliassaqarfimmi tassani maleruagassat naleqqussarneqarput.

Ilutigalugu qinnuteqaatinik pingaarnersiulluni tullerriiaarisarnerit allanngortinneqarput, inatsimmi § 14, imm. 5 takujuk. Siunissaq isigalugu tullerriiaarinerit, angallatit pisoqaassusaat angissusaallu, angallatip pisarisartagai, nunap immikkoortuisa ilaanni angallatit akuersissutillu amerlassusaat, aammalu qinnuteqartup angallammik piginnittuusimanerisa sivissusaat aallaavigalugit ingerlanneqartalissapput.

Tapiissutigineqartut angallatip nalivia aallavigalugu suli annertunerpaaffeqartinneqassapput siunnersuummi § 15 takujuk. Taamaattorli siunissaq isigalugu naliliisarnissat akigititassamut naliliisartumit aalajangersarneqartalissapput. Akigititassanut aalajangiisartussaq Aalisarnermut, Piniarnermut Nunalerinermullu Naalackersuisoqarfimmit toqqarneqassaaq. Tassunga aningaasartuutaasartut qinnuteqartumit akilerneqartassapput.

Siunnersuummi § 16, imm. 2 naapertorlugu, isaterinerit isaterivinni Aalisarnermut, Piniarnermut Nunalerinermullu Naalackersuisoqarfimmit akuerineqarsimasuni ingerlanneqartassapput. Taamatut aaqqissuussisoqarniarpoq isaterinerit avatangiisinut ajoqutaanngitsumik ingerlanneqartarnissaat qulakkeernerusinnaajumallugu.

Tamakku saniatigut nutaamik § 14, imm. 2 nr. 5-imik, aammalu § 16 imm. 4.-imik ilanngussisoqarsimavoq. Ilangussineq pissuteqartinneqarpoq Naalackersuisunit kissaatigineqanngimmat qinnuteqartut pisortanit tapiissutinik amerlanerusunik pissarsinnaasassasut, piviusumik isaterisitsinerimi aningaasartuutaasunit amerlanernik, peqatigitillugulu namminneq pisassiissutinit pigisaminniit iluanaaruteqarluarlutik tunisisinnaasarnissaat.

Taamatut oqaaseqarlunga allannguutissatut siunnersuut Inatsisartunit akuersaartumik oqallisigineqartussanngorlugu saqqummiuppara.